

# FILEMON

---

## **Pablo Filemodi Acaatiniuhaame.**

<sup>1</sup>Uujoho Pablo, jino Cristo Jesu momohalliti civojafaño iicaabo jihaameque caatinihi sano monahabo Timoteoma iidi, agaijiibo Filemon mududicamaaje nahaboniminaafidi, <sup>2</sup>bu Moocaani iijaminaa oono diijafaño igaivehicamedi, tolliro bu monago Apiadi, bu Arquipo mihaico mududicamaajeque aamusuhicaabedi icano. <sup>3</sup>Jaamo amiihai magaayici Moocaani, bu Aivojiibo Jesucristo icamisi imino omooninoco, bu sajeebii icaco aacinoco icano.

## **Filemon Gaiji, Miyaavogo Icano.**

<sup>4</sup>Fahiijivaro uujoho Moocaanico dihallivi imehicahi. Jaabo diiboma ihiimaasumi iiti esafetehicahi, <sup>5</sup>Aivojiibo Jesuco ijoho agaijinoco, imiyaavogonoco icano, bu paryi Moocaanita iicamoco agaijinoco icano uguubuuboro. <sup>6</sup>Tolliro bu Moocaanico dilluhicahi oono dimiyaavogoco aatyimemere imiyaavogomohallivi, jaamo Cristo Jesufaño di paryi iiminoco magaayicinoco imino igaajaqui. <sup>7</sup>Jaabo tajeebii jacusucafetehi, bu uujoho sihidi imo icahi ijoho sihidi gaijima idiicanoti. Miiro ijoho tañahabo, difañodi miyaavogominaa jeebii jacusucafetehi.

## **Pablo Filemon Jijovonohallivi Filemoco Idilluno.**

<sup>8</sup>Jaanegui uujoho Cristo minisuminaafi icaruubo ico tajiibajitihii ijoho omoonijinoco. <sup>9</sup>Ivi jilliro gaijifeenedi ico dilluhi. Uujoho Pablo amiyaabo iicacuubo, bu jino Cristo Jesuhalliti civojafaño iicaabo, <sup>10</sup>ico dilluhi jaani Onesimo onoohallivi. Jaabo jino civojafaño miyaavogofeenedi taseemeneti minifutucuuhi.

<sup>11</sup>Iticoni naha Onesimo jilli mihiifoobo diijjovono icauhi. Jaaruubo jisumi miyaabotiro misidi icacuuhi, iidi bu uudi icano. <sup>12</sup>Jaaboco dijaago uujoho siino galluhi. Jaaboco imino gaayici tafiico idiicajirubadi. <sup>13</sup>Imogorahi jinoovi uuma iicanoco dibuunavi uco ijeeceivequi jino Cristo jiihoghalliti civojafaño iicaaboco. <sup>14</sup>Jaaruubo uujoho imogotihii ijoho idiimogotinoco omooninoco. Jaabo uudi ijoho omoonino uujoho atajibaneri icatino iicaqui, jilli iiro idiimogooboro omoonino iicaqui. <sup>15</sup>Fine Onesimo iiti dugaavuuhii guenenene sihi iicatiqui. Jaaruubo jisumi iima fahiijivaro icacuujii. <sup>16</sup>Jaaruubo jijovonobadi icacujitihii. Jilli jijovono janaanivii imino icacuujii. Jaabo agaijiibo dinahaborucuujii. Jaaboco uujoho sihidi gaijihii. Imi jaano janaanivii ijoho diiboco gaiji diijjovono iicamaño, bu Mohaivojiiibofañodi dinahabo iicamaño icano.

<sup>17</sup>JaaneGUIiha digataavominaafi uujoho iicahachiiji diiboco gaayici uco idiicajirubadi. <sup>18</sup>Jaanoti ico diibo imitino omoonihachiiji, bu ico edebhachiiji icano ucoro toonoco daadusu. <sup>19</sup>Jaabo uujoho Pablo, jinoocoro tahuseri caatinihi: Uujoho ico jaaduji. Miiro bu uujoho ico neejirahi: Iijoho tahallivi guijevejirahi uco edebeneque daaduiqui, neejirahi. Jaarunoco ico uujoho nootihi. <sup>20</sup>JaaneGUIiha tañahabo, uudi jino iminoco deetavo Aivojiiibo Jesuco imiyaavogomo iicanicibadi. JaaneGUIiha tajeebiico daacusu Cristofañodi tañahabo idiicamaño.

<sup>21</sup>Jilli iidi caatinihi iijoho omoonijinoco agaajaaboro, bu jino ico onoonoco janaanicivi omoonijinoco agaajaaboro icano. <sup>22</sup>Bu tolliro uudi uujoho iifetejimañoco tahimega dimibachu. Miiro jino teemehi amiihai Moocanico midilluhicanoco amiihaico ihaciqui uujoho amiihaico emeecitejinoco.

### Niino Fitacu.

<sup>23</sup>Jaani Epafra onoobo dijaago iijico galluhi, jino Cristo Jesuhalliti uuma civojafaño iicaabo. <sup>24</sup>Tolliro bu Marco onoobo, bu Aristaco onoobo, bu Demas onoobo, bu Lucas icamo jino uco tadyudicamaajeti aamusuhicamo dijaago iijico gallumo.

<sup>25</sup>Jaafa Mohaivojiiibo Jesucristo amiihaico imino moonihi.